
UREDBA O ČLANARINAMA U TURISTIČKIM ZAJEDNICAMA HERCEGOVAČKO-NERETVANSKOG KANTONA*

(„Službene novine HNK”, broj 7/25)

POGLAVLJE I. OPĆE ODREDBE

Član 1.

(Predmet Uredbe)

Ovom Uredbom utvrđuju se obveznici plaćanja članarine Turističkoj zajednici Hercegovačko-neretvanskog kantona (u daljem tekstu: Turistička zajednica Kantona), osnovica i stope po kojima se obračunava i plaća članarina, način i rokovi za uplatu, kriteriji za razvrstavanje turističkih mjesta u razrede, raspoređivanje članarine, obrasci i rokovi predaje, kao i nadzor nad naplatom članarine.

POGLAVLJE II. OBVEZNICI PLAĆANJA I UTVRĐIVANJE OSNOVICE

Član 2.

(Obveznici plaćanja članarine)

(1) Obveznici plaćanja članarine turističkoj zajednici su pravna i fizička lica sa sjedištem ili organizacionim dijelom (u daljem tekstu: poslovna jedinica), na području Hercegovačko-neretvanskog kantona (u daljem tekstu: Kanton), koja ostvaruju prihod obavljanjem ugostiteljskih, turističkih ili s turizmom neposredno povezanih djelatnosti definisanih Odlukom o klasifikaciji djelatnosti Bosne i Hercegovine („Službeni glasnik BiH“, broj 47/10), i to iz sljedećih područja i grana (razreda):

a) PODRUČJE D/ PROIZVODNJA I SNADBIVJEVANJE ELEKTRIČNOM ENERGIJOM, PLINOM, PAROM I KLIMATIZACIJA (35 Proizvodnja i snadbijevanje električnom energijom, plinom parom i klimatizacija)

b) PODRUČJE G/TRGOVINA NA VELIKO I MALO; POPRAVAK MOTORNIH VOZILA I MOTO-CIKALA (45 Trgovina na veliko i malo motornim vozilima i motociklima; 46 Trgovina na veliko, osim trgovine motornim vozilima i motociklima; 47 Trgovina na malo, osim trgovine motornim vozilima i motociklima)

c) PODRUČJE H/PREVOZ I SKLADIŠTENJE (49 Kopneni prevoz i cjevovodni transport; 50 Vodeni prevoz; 51 Zračni prevoz; 52 Skladištenje i pomoćne djelatnosti u prevozu; 53 Poštanske i kurirske djelatnosti)

d) PODRUČJE I/DJELATNOSTI PRUŽANJA SMJEŠTAJA, TE PRIPREME I USLUŽIVANJA HRANE (HOTELIJERSTVO I UGOSTITELJSTVO) (55 Smještaj; 56 Djelatnost pripreme i usluživanja hrane i pića),

e) PODRUČJE J/INFORMACIJE I KOMUNIKACIJE (58 Izdavačke djelatnosti; 59 Proizvodnja filmova, video filmova i televizijskog programa, djelatnost snimanja zvučnih zapisa i izdavanje muzičkih zapisa; 60 Emitovanje programa; 61 Telekomunikacije; 62 Računarsko programiranje, savjetovanje i djelatnosti u vezi s njima; 63 Informacijske i uslužne djelatnosti),

f) PODRUČJE K/FINANSIJSKE DJELATNOSTI I DJELATNOSTI OSIGURANJA (64 Finansijske uslužne djelatnosti, osim osiguranja i penzionih fondova; 65.12 Ostalo osiguranje; 66.12 Djelatnost posredovanja u poslovanju vrijednosnim papirima i robnim ugovorima (mjenjačnica),

g) PODRUČJE L/POSLOVANJE NEKRETNINAMA (68 Poslovanje nekretninama),

h) PODRUČJE M/STRUČNE, NAUČNE I TEHNIČKE DJELATNOSTI (69 Pravne i računovodstvene djelatnosti; 70 Upravljačke djelatnosti, savjetovanje u vezi s upravljanjem; 71 Arhitektonske i inženjerske djelatnosti i s njima povezano tehničko savjetovanje; 73 Promocija (reklama i propaganda) i istraživanje tržišta; 74 Ostale stručne, naučne i tehničke djelatnosti),

i) PODRUČJE N/ADMINISTRATIVNE I POMOĆNE USLUŽNE DJELATNOSTI (77 Djelatnost iznajmljivanja i davanja u zakup (lizing); 79 Putničke agencije, organizatori putovanja, touroperator i ostale rezervacijske usluge, te djelatnosti u vezi s njima; 80 Zaštitne i istražne djelatnosti; 81 Usluge u vezi s upravljanjem i održavanjem zgrade, te djelatnosti uređenja i održavanja zelenih površina; 82 Uredske, administrativne i pomoćne djelatnosti, te ostale poslovne i pomoćne djelatnosti),

j) PODRUČJE R/UMJETNOST, ZABAVA I REKREACIJA (91.03 Rad historijskih mjesta i građevina, te sličnih znamenitosti za posjetitelje; 92 Djelatnost kockanja i kladenja; 93 Sportske, zabavne i rekreativne djelatnosti (osim 93.12 Djelatnost sportskih klubova),

* Uredba je objavljena u „Službenim novinama HNK”, broj 7/25 od 19. maja 2025. godine, a stupila je na snagu 20. maja 2025. godine.

k) PODRUČJE S/OSTALE USLUŽNE DJELATNOSTI (95 Popravak računara i predmeta za ličnu upotrebu i domaćinstvo; 96 Ostale lične uslužne djelatnosti (osim 96.3 Pogrebne i srodne djelatnosti)).

(2) Odredbe ove uredbe primjenjuju se i na podružnice, predstavništva i druge organizacione oblike stranih fizičkih i pravnih lica, koja na području Kantona obavljaju djelatnosti propisane u stavu 1. ovog člana.

Član 3.

(Početak obaveze plaćanja članarine)

Obaveza plaćanja članarine počinje danom početka obavljanja djelatnosti pravnog ili fizičkog lica na području Kantona.

Član 4.

(Utvrđivanje osnovice za obračun članarine)

(1) Osnovica za obračun članarine pravnom licu je ukupan prihod ostvaren u djelatnostima određenim članom 2. stav 1. Uredbe. Ukupan prihod u smislu ove Uredbe, čine svi prihodi koje je pravno lice dužno iskazati u računu dobiti i gubitka prema odredbama važećih propisa koji uređuju oblast računovodstva i revizije u Federaciji Bosne i Hercegovine.

(2) Prilikom obračuna turističke članarine, pravna lica sa sjedištem u Kantonu, a koja imaju poslovne jedinice izvan Kantona, osnovicu iz stava 1. ovog člana utvrđuju tako da ukupan prihod pravnog lica umanjuju za ukupan prihod ostvaren u tim poslovnim jedinicama.

(3) Osnovicu iz stava 1. ovog člana, za pravna lica sa sjedištem izvan Kantona, a koja putem poslovnih jedinica na području Kantona obavljaju djelatnost, predstavlja ukupan prihod ostvaren u tim poslovnim jedinicama.

(4) Osnovica iz stava 3. ovog člana utvrđuje se pojedinačno za svaku poslovnu jedinicu.

(5) Osnovicu za obračun članarine fizičkom licu, bez obzira na to da li je fizičko lice registrovano ili ne za obavljanje te djelatnosti, predstavlja ukupan poslovni prihod u skladu sa odredbama važećih propisa koji uređuju način utvrđivanja i plaćanja poreza na dohodak fizičkih lica u Federaciji Bosne i Hercegovine.

POGLAVLJE III. VISINA, NAČIN PLAĆANJA, KRITERIJI ZA RAZVRSTAVANJE TURISTIČKIH MJESTA U RAZREDE, ROKOVI, RASPODJELA SREDSTAVA OD ČLANARINE I ZASTARA

Član 5.

(Određivanje visine članarine)

(1) Visina članarine koju plaća pravno i fizičko lice kao obavezni član turističke zajednice zavisi:

- a) o razredu turističkog mjesta gdje je sjedište ili poslovna jedinica pravnog lica,
- b) o pripadnosti pravnom ili fizičkom licu,
- c) o stopi na ukupan prihod utvrđenoj ovom Uredbom.

Član 6.

(Vrijednost pokazatelja za razvrstavanje turističkih mjesta)

(1) Turistička mjesta u kantonu, po svome značaju za turizam, razvrstavaju se u razrede na osnovu službenih statističkih podataka prema sljedećim pokazateljima:

- a) trogodišnjem prosjeku ostvarenog broja turističkih noćenja u turističkom mjestu (broj noćenja),
- b) broju turističkih noćenja iz stava 1. tačka a) ovog člana po stanovniku turističkog mjesta (koeficijent intenziteta turističkog prometa),
- c) ukupnoj vrijednosti prometa u ugostiteljskoj djelatnosti po stanovniku mjesta (koeficijent specifičnog prometa).

(2) Vrijednost pokazatelja iz stava 1. tačke a). ovog člana izračunava se iz broja noćenja u tri uzastopne kalendarske godine koje su neposredno prethodile godini u kojoj se obavlja izračunavanje.

(3) Vrijednost pokazatelja iz stava 1. tačke c). ovog člana izračunava se na osnovu podataka za posljednju godinu koja prethodi godini u kojoj se obavlja izračunavanje.

(4) Broj stanovnika iz stava 1. tačaka b). i c). ovog člana izračunava se na osnovu podataka prema posljednjem popisu stanovništva u BiH.

Član 7.

(Razvrstavanje turističkih mjesta)

(1) Prema pokazateljima iz člana 6. ove uredbe, turistička mjesta razvrstavaju se u razrede: A i B.

(2) Pravilnik o proglašenju i razvrstavanju turističkih mjesta u razrede donosi ministar Ministarstva trgovine, turizma i zaštite okoliša, (u daljem tekstu: ministar).

Član 8.

(Razvrstavanje turističkih mjesta u razred A)

(1) Turističko mjesto razvrstava se u razred A, ako njegove pojedinačne vrijednosti pokazatelja (član 6. stav

1. tačke a., b. i c.), prelaze najmanje dvije od tri granične vrijednosti pokazatelja.

(2) Granične vrijednosti pokazatelja za razvrstavanje u razred A su:

- a) trostruka srednja vrijednost pokazatelja iz člana 6. stav 1. tačka a) ove Uredbe;
- b) dvostruka srednja vrijednost pokazatelja iz člana 6. stav 1. tačka b) ove Uredbe;
- c) 50% veća srednja vrijednost pokazatelja iz člana 6. stav 1. tačka c) ove Uredbe.

Član 9.

(Razvrstavanje turističkih mjesta u razred B)

(1) Turističko mjesto razvrstava se u razred B ako njegove pojedinačne vrijednosti pokazatelja (član 6. stav 1. tačke a., b. i c.), prelaze najmanje dvije od tri granične vrijednosti pokazatelja.

(2) Granične vrijednosti pokazatelja za razvrstavanje u razred B su:

- a) dvostruka srednja vrijednost pokazatelja iz člana 6. stav 1. tačka a). ove Uredbe;
- b) dvostruka srednja vrijednost pokazatelja iz člana 6. stav 1. tačka b). ove Uredbe;
- c) srednja vrijednost pokazatelja iz člana 6. stav 1. tačka c). ove Uredbe.

Član 10.

(Srednja vrijednost pokazatelja)

(1) Srednja vrijednost pokazatelja utvrđuje se na način da se vrijednosti pokazatelja svih turističkih mjesta poredaju po veličini u niz, posebno za svaki od pokazatelja iz člana 6. stav 1. tačke a.), b). i c). ove Uredbe, nakon čega se za svaki niz izračunava medijan.

(2) Medijani iz stava 1. ovog člana predstavljaju srednje vrijednosti pokazatelja.

Član 11.

(Reklasifikacija razreda turističkih mjesta)

(1) Ministarstvo trgovine, turizma i zaštite okoliša, može izvršiti reklasifikaciju turističkog mjesta, u viši ili niži razred, ako su u mjestu nastale promjene u obimu i kvaliteti turističke ponude uz prethodno pribavljeno mišljenje turističke zajednice jedinice lokalne samouprave, a ukoliko ista ne postoji turističke zajednice kantona.

(2) Prijedlog za reklasifikaciju turističkog mjesta ministarstvu, može uputiti i Turistička zajednica Kantona.

(3) O prijedlogu iz stava 2. ovog člana, odlučuje ministar.

Član 12.

(Stope obračuna članarine prema razredu turističkog mjesta)

(1) Obveznici uplate članarine iz člana 2. ove Uredbe plaćaju članarinu zavisno od pravnog statusa i od razrede turističkog mjesta po sljedećim procentima:

Razredi turističkog mjesta		
Pravni status obveznika	A	B
Pravno lice	0,05	0,045
Fizičko lice	0,025	0,02

Član 13.

(Način i rokovi plaćanja članarine)

(1) Obveznici uplate članarine iz člana 2. Uredbe dužni su istu obračunati i uplatiti na račun Turističke zajednice Kantona, u skladu s odredbama važećeg Pravilnika o načinu uplate, pripadnosti i raspodjeli javnih prihoda u Federaciji BiH.

(2) Obveznici iz stava 1. ovog člana, čiji je iznos članarine u prethodnoj godini iznosio 300 KM i više, obračunavaju i uplaćuju članarinu do desetog dana tekućeg mjeseca za prethodni mjesec.

(3) Obveznici iz stava 1. ovog člana, čiji je iznos članarine u prethodnoj godini iznosio manje od 300 KM, obračunavaju i uplaćuju članarinu do kraja januara tekuće godine za prethodnu godinu.

Član 14.

(Prestanak obaveze plaćanja članarine)

Obaveza plaćanja članarine prestaje prestankom postojanja pravnog lica, smrću fizičkog lica, prestankom rada poslovne jedinice, promjenom sjedišta ili prestankom ostvarivanja prihoda pružanjem ugostiteljskih, turističkih ili s turizmom neposredno povezanih djelatnosti.

Član 15.

(Namjena i raspodjela sredstava od članarine)

(1) Turistička zajednica Kantona prikuplja sredstva od članarine i vodi jedinstvenu bazu podataka o obveznicima uplate, za područje cijelog Kantona.

(2) Članarina predstavlja prihod Turističke zajednice Kantona, kao i prihod turističke zajednice općine ili

grada, ukoliko su iste osnovane.

(3) Prikupljena sredstva od članarine, Turistička zajednica Kantona raspoređuje na sljedeći način :

a) 60% od ukupno prikupljenih sredstava na području općine/grada doznava se turističkoj zajednici te općine/grada, pod uslovom da je ista osnovana,

b) 40% prikupljenih sredstava ostaje prihod Turističke zajednice Kantona.

(4) Turistička zajednica Kantona, obavezna je rasporediti sredstva prikupljena od turističke članarine, shodno odredbama stava 3. ovog člana.

(5) Sredstva prikupljena od članarine turističkim zajednicama općine/grada pripadaju od dana upisa u Upisnik turističkih zajednica kojeg vodi Ministarstvo trgovine, turizma i zaštite okoliša.

(6) Sredstva od članarine, uplaćena za period do upisa turističkih zajednica općine/grada u Upisnik turističkih zajednica, predstavljaju prihod Turističke zajednice Kantona.

(7) Ako nije osnovana turistička zajednica na nivou općine/grada, sredstvima prikupljenim na osnovu članarine, raspolaže Turistička zajednica Kantona.

Član 16.

(Utrošak sredstava od članarine koja pripadaju turističkim zajednicama)

(1) Turistička zajednica Kantona i turističke zajednice općina/gradova dužna su sredstva koja im pripadaju od članarine turističkim zajednicama rasporediti na sljedeći način:

a) 45% za unapređenje turizma,

b) 10% namjenski za očuvanje, zaštitu i obnavljanje prirodne baštine i kulturno- historijske baštine koje imaju turistički karakter i turistički potencijal.

(2) Sredstva iz stava 1. ovog člana utrošit će se prema godišnjem programu koje donose skupštine turističke zajednice Kantona, općina/gradova.

Član 17.

(Obrazac prijave članarine i rokovi predaje)

Obveznici plaćanja članarine turističkim zajednicama iz člana 4. stav 2., 3., i 5. Uredbe, dužni su podnijeti obrazac prijave obračuna i uplate članarine turističkim zajednicama, Turističkoj zajednici Kantona, do kraja marta tekuće godine za prethodnu godinu.

Član 18.

(Zastara i prinudna naplata)

(1) Obračun i naplata članarine turističkim zajednicama zastarijeva za pet godina po isteku godine u kojoj je nastala obaveza plaćanja članarine.

(2) Postupak prinudne naplate neizmirenih obaveza, po osnovu turističke članarine provodi se u skladu s propisima u primjeni u Federaciji BiH.

(3) U slučaju bilo kojeg oblika reorganizacije pravnog lica (spajanje, pridruživanje, dijeljenje, odvajanje, itd.), obavezu pravnog lica koja je bila predmet reorganizacije izmiruje njezin nasljednik (nasljednici).

POGLAVLJE IV. NADZOR

Član 19.

(Inspeksijski nadzor)

(1) Inspeksijski nadzor u provođenju Uredbe, pojedinačnih akata, uslova i načina rada nadziranih pravnih i fizičkih lica provode:

a) kantonalni i općinski/gradski tržišni inspektori,

b) kantonalni i općinski/gradski turističko-ugostiteljski inspektori,

c) drugi inspeksijski organi, u skladu sa zakonskim ovlaštenjima.

POGLAVLJE V. PREKRŠAJNE ODREDBE

Član 20.

(1) Novčanom kaznom u iznosu od 2.000,00 KM do 8.000,00 KM kaznit će se za prekršaj pravno lice ako u propisanom roku :

a) ne obračuna i ne uplati članarinu Turističkoj zajednici Kantona (član 13. st. 1., 2. i 3.),

b) ne podnese obrazac prijave obračuna i uplate članarine turističkim zajednicama na način propisan odredbama člana 17. Uredbe,

(2) Novčanom kaznom u iznosu od 1.000,00 KM do 4.000,00 KM kaznit će se za prekršaj iz stava 1. ovog člana i odgovorno lice u pravnom licu.

(3) Novčanom kaznom u iznosu od 1.000 do 3.000 KM, kaznit će se fizičko lice za prekršaj iz stava 1. ovog člana.

POGLAVLJE VI. PRELAZNE I ZAVRŠNE ODREDBE

Član 21.

(Rok za donošenje obrasca za uplatu članarine)

Ministar će propisati oblik i sadržaj obrasca za prijavu obračuna i uplate članarine turističkim zajednicama u roku od 30 dana od dana stupanja na snagu ove uredbe.

Član 22.

(Prestanak važenja ranije uredbe)

Danom stupanja na snagu ove Uredbe prestaje važiti Uredba o članarinama u turističkim zajednicama u HNK („Službene novine HNK“, broj: 9/24) .

Član 23.

(Usaglašavanje obračuna i uplate)

Obveznici obračuna i uplate članarine, koji su do stupanja na snagu ove uredbe članarinu obračunavali i uplaćivali akontativno, dužni su uskladiti način obračuna i uplate članarine sa odredbama ove Uredbe u roku od 60 dana od dana stupanja na snagu.

Član 24.

(Stupanje na snagu)

Uredba stupa na snagu narednog dana od dana objavljivanja u “Službenim novinama Hercegovačko-neretvanskog kantona”.